



UNIVERSIDADE DA CORUÑA

MODIFICACIÓN DO REGULAMENTO DE ESTUDOS DE DOUTORAMENTO (Aprobado na Xunta de Goberno do 9 de xuño de 1999 e modificado no Consello de Goberno do 22 de xullo de 2005)

Modificado no Consello de Goberno do 30 de outubro de 2008 por proposta da Comisión de Doutoramento para súa adaptación ao RD 1393/2007 polo que se establece a ordenación das ensinanzas universitarias oficiais.

CAPÍTULO IV SOBRE A TESE DE DOUTORAMENTO

Artigo 15. A tese de doutoramento

As persoas que, unha vez obtida a suficiencia investigadora, aspiraren á obtención do título de doutor, deberán presentar e obter a aprobación da correspondente tese de doutoramento. A tese de doutoramento consistirá nun traballo persoal e orixinal de investigación sobre unha materia relacionada co campo científico, técnico ou artístico propio do programa de doutoramento.

Artigo 16. Director/a de tese

1. Para a elaboración da tese de doutoramento, o Consello de Departamento responsable do programa de doutoramento asignaralle ao/á doutorando/a un/unha director/a de tese, que será un/unha doutor/a con experiencia investigadora acreditada. A tese poderá ser tamén codirixida por varios/as doutores/as.
2. Para ser director/a de tese será necesario estar en posesión do título de doutor e ter vinculación permanente ou temporal con algún dos departamentos ou institutos universitarios que organicen o programa de doutoramento. Calquera outro/a doutor/a poderá ser director/a de tese, tras o acordo da Comisión de Doutoramento.
3. Calquera cambio na dirección dunha tese esixirá a renuncia expresa do/a director/a desta. Caso de non producirse, o/a doutorando/a poderá solicitar, mediante escrito razoado ao Consello do Departamento responsable, o cambio de director/a de tese.

Artigo 17. Presentación do proxecto da tese de doutoramento

Antes da obtención da suficiencia investigadora, unha vez obtida, ou acompañando á súa solicitude, o/a doutorando/a presentará no Departamento correspondente un proxecto de tese de doutoramento avalado polo/a director/a ou directores/as desta, que consistirá nunha memoria explicativa do traballo que se pretende realizar. O proxecto de tese será sometido á aprobación do Consello do Departamento responsable nun prazo non superior a 30 días hábiles tras a súa presentación. A resolución do Consello comunicarse á Comisión de Doutoramento. En caso de resolución negativa, e por solicitude do/a alumno/a interesado ou do/a seu/súa director/a de tese, a Comisión de Doutoramento poderá solicitar informes de persoas expertas no tema da tese e elaborará a correspondente proposta ao Consello de Goberno.

Artigo 18. Admisión a trámite de lectura da tese de doutoramento

1. Rematada a elaboración da tese de doutoramento, o/a director/a ou os/ as directores/as desta autorizarán a súa presentación. Esta autorización deberá acompañarse á tese de doutoramento para a súa posterior tramitación. Cando o/a director/a da tese non sexa profesor/a do departamento responsable do programa de doutoramento cursado polo/a doutorando/a, o/a titor/a ratificará, mediante escrito razoado, a autorización do/a director/a para a súa presentación.

2. A tese de doutoramento redactarase en galego ou en castelán. En casos especiais, e após autorización expresa da Comisión de Doutoramento, poderase presentar e/ou defender noutro idioma dos oficiais en España, na Unión Europea ou en latín. Neste caso, a tese acompañarase dun resumo en galego ou en castelán, en que necesariamente se incluírá unha introdución, unha descrición da metodoloxía utilizada, as conclusións da tese e as contribucións máis relevantes desta. En todo caso, o departamento responsable debe contar coa autorización da Comisión de Doutoramento antes de realizar os trámites que se describen a continuación.

3. A tese de doutoramento, tras a conformidade do Consello do Departamento responsable, presentarase á Comisión de Doutoramento que o comunicará a todos os departamentos e institutos universitarios. Para os efectos de dita presentación, o/a doutorando/a entregará no Rexistro do Terceiro Ciclo da Universidade dous exemplares da tese acompañados dos escritos de autorización do/a director/a ou directores/as da tese e do/a titor/a se proceder e coa conformidade do departamento responsable.

4. Durante un prazo de quince días hábiles, a tese permanecerá en depósito, un exemplar na Comisión de Doutoramento e outro no departamento responsable do programa, para os efectos de que calquera doutor poida examinala e, se for o caso, dirixir por escrito á Comisión de Doutoramento as consideracións que estime oportunas. O mes de agosto non se considerará hábil para os efectos deste prazo.

5. Cando, pola natureza do traballo de tese de doutoramento, non permitir a súa reprodución, o requisito da entrega de exemplares a que se refire o apartado 3 quedará cumprido co depósito do orixinal no Rexistro de Terceiro Ciclo da Universidade.

6. Transcorrido o tempo de depósito, a Comisión de Doutoramento, á vista dos escritos recibidos e tras a consulta ao departamento e aos especialistas que estime oportunos, decidirá se se admite a tese a trámite ou se, polo contrario, procede retirala.

Artigo 19. O tribunal de lectura da tese de doutoramento

1. Admitida a tese a trámite, o/a director/a do departamento correspondente solicitará da Comisión de Doutoramento, oído o/a directo/a da tese, o nomeamento do tribunal que ha de xulgarla.

2. O tribunal encargado de xulgar as tese de doutoramento será nomeado pola Comisión de Doutoramento, de entre dez especialistas na materia a que se refire a



UNIVERSIDADE DA CORUÑA

tese ou noutra que garde afinidade con ela, propostos polo Consello de Departamento responsable, oídos o/a director/a da tese e os/as especialistas que a comisión estime oportuno consultar.

A proposta do departamento a que se refire o parágrafo anterior irá acompañada dun informe razoado sobre a idoneidade de todos e cada un dos membros propostos para constituír o tribunal. Neste informe farase constar, para os membros que non pertencen aos corpos docentes universitarios, a mención de "Doutor pola Universidade de..." e o ano de obtención do título. En todos os casos se especificarán os méritos máis relevantes que fan a cada membro idóneo para formar parte do tribunal.

3. O tribunal estará constituído por cinco membros titulares e dous suplentes, todos eles doutores, españois ou estranxeiros, con experiencia investigadora acreditada. En ningún caso poderán formar parte do tribunal máis de dous membros da Universidade da Coruña. Tampouco poderán formar parte do tribunal máis de dous membros de calquera outra universidade con que se comparta a responsabilidade da expedición do título, se se dá o caso.

Os profesores pertencentes aos corpos docentes universitarios poderán formar parte dos tribunais de teses de doutoramento aínda que se atopen en calquera das modalidades da situación de excedencia e xubilación.

En ningún caso poderán formar parte do tribunal o/a director/a da tese nin o/a titor/a, salvo nos casos de teses presentadas no marco de acordos bilaterais de cotutela con universidades estranxeiras que así o teñan previsto.

4. A Comisión de Doutoramento designará, entre os membros do tribunal, o/a presidente/a e o/a secretario/a. En caso de imposibilidade de actuación do/a presidente/a titular, este/a será substituído/a polo primeiro vogal e este/a polo primeiro suplente. En caso de imposibilidade de actuación do/a secretario/a titular, este/a será substituído polo terceiro vogal e este/a polo primeiro suplente. En todos os outros casos o primeiro suplente substituirá o primeiro membro que non poida actuar.

Artigo 20. Lectura da tese de doutoramento

1. Unha vez designado e constituído o tribunal a que se refire o apartado 3 do artigo anterior, o departamento responsable faralles chegar, no prazo de dez días, a tese que ha de ser xulgada xunto co currículo do/a doutorando/a aos membros do tribunal.

A partir dese momento, os membros titulares do tribunal (ou os correspondentes suplentes, se algún dos membros titulares non actuase) disporán dun mes para enviaren á Comisión de Doutoramento un ditame individual sobre se procede ou non conceder a autorización da defensa da tese. Se o ditame non é favorable, deberá acompañarse dun informe individual e razoado que o xustifique. Se todos os ditames son favorables, o Presidente da Comisión de Doutoramento autorizará a defensa pública da tese, de que se informará a todos os membros da Comisión. En caso contrario, e á vista dos informes, a Comisión de Doutoramento disporá se procede ou non a defensa pública ou, se for o caso, a interrupción da súa tramitación. Nos casos de non autorización da defensa da tese a Comisión deberalle comunicar por escrito ao/á doutorando/a, ao/á director/a da tese e ao Consello de Departamento responsable do programa de doutoramento as razóns da súa decisión.



UNIVERSIDADE DA CORUÑA

O/a director/a da tese de doutoramento poderá ser chamado/a pola Comisión de Doutoramento antes de decidir sobre o trámite a que se refire o parágrafo anterior, co fin de obter a información que se considere oportuna para fundamentar a decisión. En todo caso deberá ser oído antes de que a Comisión de Doutoramento acorde, se o fixer, que non procede a defensa da tese.

2. Unha vez denegada a realización do trámite de defensa da tese de doutoramento pola Comisión de Doutoramento, ou despois da súa defensa, o/a doutorando/a poderá solicitar certificación literal dos ditames a que se refire o apartado 1 deste artigo.

3. O acto de defensa da tese de doutoramento terá lugar en sesión pública durante o período lectivo do calendario académico. Unha vez autorizada a defensa da tese, o acto será convocado polo/a presidente/a do tribunal quen llo comunicará á Comisión de Doutoramento cunha antelación mínima de dez días naturais á súa realización, para a súa pública difusión. Coa mesma antelación anunciarase no taboleiro de anuncios do departamento correspondente e no do centro en que vai ter lugar o acto de defensa.

4. A defensa da tese de doutoramento consistirá na exposición polo/a doutorando/a do labor preparatorio realizado, a metodoloxía, o contido da tese e as conclusións, facendo especial mención das súas contribucións orixinais.

A defensa da tese de doutoramento realizarase no mesmo idioma en que esta estiver redactada, salvo nos casos en que a Comisión de Doutoramento autorizase previamente o seu defensa noutro idioma. No caso de que a tese non estivese redactada en castelán nin en galego ou fose defendida noutro idioma, o doutorando deberá ler no acto de defensa o resumo dela recollido no apartado 2 do artigo 18 deste regulamento.

5. Os membros do tribunal deberán expresar a súa opinión sobre a tese presentada e poderán formular cantas cuestións e obxeccións consideraren oportunas, a que o doutorando haberá de contestar. Así mesmo, os/as doutores/as presentes no acto público poderán formular cuestións e obxeccións, e o/a doutorando/a responder, todo iso no momento e forma que sinale o presidente do tribunal.

6. Rematada a defensa e discusión da tese, cada membro do tribunal formulará por escrito unha valoración sobre ela. O tribunal outorgará a cualificación global que finalmente concede á tese consonte a seguinte escala: "non apto", "aprobado", "notable" ou "sobresaliente". O tribunal poderá outorgar a mención de "cum laude" se a cualificación global é de sobresaliente e emítese, en tal sentido, o voto favorable por unanimidade.

En todo caso, a cualificación que proceda farase constar no anverso do correspondente título de doutor.

Artigo 21. Archivo de teses de doutoramento

1. Unha vez superada a defensa da tese, o departamento remitiralle á Comisión de Doutoramento un orixinal dela, un exemplar en formato electrónico e un resumo de 200 palabras para os efectos de arquivo e documentación. O resumo incluirá unha



UNIVERSIDADE DA CORUÑA

relación de palabras clave e poderá estar escrito en galego ou español, e preferiblemente nestas dúas linguas e en inglés.

2. A Comisión de Doutoramento, á súa vez, remitiralle ao Consello de Universidades, ao Ministerio de Ciencia e Innovación e á Consellería de Educación e Ordenación Universitaria da Xunta de Galicia a correspondente ficha de tese e calquera outra información ou documentación que sexa necesaria de acordo coa lexislación vixente.

Artigo 22. Publicación das teses de doutoramento

1. A Universidade da Coruña publicará en internet o resumo da tese de doutoramento a que se fai referencia no artigo anterior.

2. No caso de que o/a novo doutor/a o autorice expresamente, a Universidade da Coruña tamén publicará en internet a tese de doutoramento.

CAPÍTULO VIII

SOBRE O DOUTORAMENTO EUROPEO

Artigo 32. Concesión da mención de "Doutor europeo"

A concesión da mención "Doutor europeo" atribuirase ás teses de doutoramento, cuxa elaboración e defensa cumpra cos seguintes requisitos:

1. A autorización da defensa da tese de doutoramento debe ir precedida de informes favorables realizados por un mínimo de dous doutores expertos pertencentes a institucións de educación superior ou centros de investigación doutros países da Unión Europea. Estes informes serán solicitados polo departamento responsable e deberán ser enviados á Comisión de Doutoramento coa proposta de tribunal a que se fai referencia no apartado 2 do artigo 19, xustificando da mesma forma a idoneidade dos expertos elixidos.
2. Polo menos un membro da Comisión que xulgue a tese debe pertencer a unha institución de educación superior ou centro de investigación doutro país da Unión Europea, sen que poida existir coincidencia cos expertos que realizaron o informe previo recollido no punto anterior
3. Unha parte da defensa da tese de doutoramento, polo menos o resumo e as conclusións, debe realizarse e presentarse nunha das linguas oficiais da Unión Europea distinta a calquera das linguas oficiais en España.
4. O/a doutorando/a deberá acreditar que para a elaboración da súa tese de doutoramento realizou unha estadía de polo menos tres meses, nunha institución de educación superior ou centro de investigación doutro país da Unión Europea, cursando estudos ou realizando traballos de investigación que lle foron recoñecidos pola UDC.